

Programma quo ... polemo-sophiam angelorum academiis praefectorum in festo Michaelis civibus academicis serio meditandam proponit, & ... commendat / [Georg Detharding].

Contributors

Detharding, Georg, 1671-1747.

Publication/Creation

Rostock : J.J. Adler, [1732]

Persistent URL

<https://wellcomecollection.org/works/qrmh5x3x>

License and attribution

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection
183 Euston Road
London NW1 2BE UK
T +44 (0)20 7611 8722
E library@wellcomecollection.org
<https://wellcomecollection.org>

PROGRAMMA,
QVO
RECTOR ACADEMIÆ
ROSTOCHIENSIS,
GEORGIUS DETHAR-
DING,
Med. D. Profess. Publ. & totius
Academiæ Senior.

POLEMO-SOPHIAM
ANGELORUM ACADEMIIS
PRÆFECTORUM
IN FESTO MICHAELIS,
CIVIBUS ACADEMICIS
serio meditandam proponit,
& quo par est studio
commendat.

ROSTOCHII,
Typis IO. IACOB. ADLERI, SEREN. PRINC.
& ACAD. Typographi.



Non mirabimini, confido, CL-
VES OPTIMI ! quod *Polemosophiam*
Angelorum Almis concessorum in
horum porro fortitudinem, com-
militonum vero Imitamentum me-
ditandam hodie commendem ; In
templis quippe resonant voces Ora-
torum sacrorum de *Polemosophia*
Angelorum Archangelum *Michaelem* in pugna cum Dra-
cone & hujus sociis circumdantium ; ad hujus vero coe-
lestis agminis exemplar, ut omnes se componant, qui
obsequiosissime pro gloria DEI pugnandum habent, iti-
dem studiose inculcatur diligenterque. Vel maxime
opus est, ut hi ad illam attendant, quibus speciatim
demandatum ut bella pro veritate gloriam DEI exal-
tante gerant animose, & assistente Duce valde bellicoso,
ac idem ille Michaël est, omnia suscipienda ad normam
& regulas disciplinæ militaris coelestis instruant pru-
denter. Tales vero sunt, qui titulo Professorum in Almis
fulgent, *Doctores publici*. Quantumvis enim præter hos
alii in almis degant, à quorum in docendo sedulitate, hinc
studio pro veritate, publica salus, specialissime gloria
Divina non parum laudis capit : eos tamen comparaveri-
mus cum Voluntariis in exercitu, qui sponte militant ;
in quorum arbitrio repositum est, an se immiscere præ-
liis & socios discriminum agere, an spectatores eminus
observare velint, quibus viribus certantes congredian-
tur ? Haud ergo stipendio conducti exercitum comi-
tantur. Nec in malam partem interpretabimini, spero,
quod titulum Angelorum Academiæ ad Professores
sacra Biblia sibi sumentes, ut, quæ in his ad veritatem
æstimandam revelata sunt, unicuique ostendant, non
restrin-



58700(68)

restringam ; angelicum quippe officium reliquorum
Professorum studium itidem dicendum est, qui, cum ve-
ritatis imperium longe lateque se extendat, sic jubente
summo Almarum Statore & Moderatore à vicariis Ar-
changeli Michaëlis in Almas mittuntur & ablegantur,
ut Deceptionem omnibus modis oppugnent. Abhinc
penes hos æque ac illos ardens est desiderium, quosvis
suo præsidio commissos manuducendi ad scopum memo-
raturum, sint licet methodi & viæ eò perveniendi diversæ.
Illos ergo omnes hodie, ut Gideones suos, ut suos Jona-
thanes, verbo: Campi Duces & Officiales suos commen-
datos volo his, qui milites Tyrones, studiosorum no-
mine salutantur, ut provide decertantes indefesso studio
observent, pede inoffenso sequantur, hostium stratage-
mata intelligere addiscant, & quo tandem ipsi Officiales
constituantur, quorum fidei præsidia pro salute Veritatis
& scientiarum hanc roborantium incremento committi
possint, magna attentione & virtute sua mereantur. In
quo, dum ero occupatus, ubertatem dicendi axiomatibus
quibusdam includam.

*Polemosophia monet Angelos Academiæ, ut voci &
exemplo unius Ducis omnia dent.* Non est, ut memorem,
quam in prælio supremi Ducis cum Satana, Angeli satel-
lites ad nutum ejus omnia peregerint, & quod de illis
alibi Sacer Codex monet, se faciem DEI haud interrup-
ptim observare quo ad nutum & ictum oculi sint para-
tissimi, & hic præstiterint ; quandoquidem notius est, ac
quod notissimum, exercitum, nisi ad unum intentus fue-
rit, vario tumultu turbari, plurimisque se in Duces eri-
gentibus, plus nocumenti, quam adjumenti expectan-
dum esse. De *Alexandro M.* refert *Justinus*, quod æque
absolum illi fuerit visum, saluum fore terrarum statum,

fi duo regna summa admiserit, ac si mundus duobus solibus illustraretur; pariter sub conflictu cum inimicis scientiarum & artium hostibus, nisi summa potestas uni conferatur, agmina *opinionum, errorum, hallucinationum conjecturarum* invasions suas, captivos ducendo perquam multos, continuabunt, nec desinent, quoties libuerit, agros sapientiæ devastare. Quem vero constituerimus prudentem magis magisque gloriosum, ac in quo non modo quatuor hæ res insunt, quas in summo imperatore inesse volunt: *Militaris artis Peritia, Virtus, Authoritas, Felicitas*; sed qui errorum subjugandorum Hercule longe major Domitor, tenebrarum vero mentem obfuscantium, jacto radiorum suorum æstu, Jubar regale, ad sensum apophthegmatis venerabilis: *Timor Domini, initium sapientiæ*. Quantus jam teneat Angelos Academiæ sciendi ardor, quanta sit horum ingenii vis in latebras & recessus absconditos inscitæ penetrandi, quantum desiderium adversus monstra hypothesium per omnem vitam reluctandi, magni ac feroces spiritus sub memorati Ducis imperio sunt continendi, quo nihil ambitiose, nihil præcipitanter, nihil inepte agatur. Stet pro ratione Voluntas illius; obsequii vero gloria ex inimicis justum triumphum reportabit & verum.

Polemosophia hortatur Angelos Academiæ, ut Vexilli propositi, cui nomen Veritatis est inscriptum, rationem probe habeant. Constat, quam milites signum habeant sequendi, cui se juramento quoque obstringunt; nec destituuntur Doctores publici sacramento cui se alligatos norunt. Quantumvis vero, prouti regiminum varia sunt in exercitu genera, diversi quoque in almis sunt coetus diversis expeditionibus destinati, unum tamen primarium manet vexillum, quod præ se fert *Veritatem*. Monstrent hanc

hanc alii ex revelatione : alii ex natura rerum creatarum : commendent illam ex officiis salutem publicam & conservationem generis humani respicientibus alii : omnibus eadem manet attentio vexilli constituti, i. e. ut veritas regnet. Est hæc serpentis ænei instar, quem tempore Mosis omnes & singuli Israelitæ contemplan- dum habuerunt, si voluerunt sibi consultum, eminus fue- rint, aut cominus constituti. Pro illa ergo standum & pugnandum, plus quam pro aris & focis, eoque acutius decernendum, quo stratagematibus, quæ modo ingeni- um, modo præjudicia, modo aliter statuentium multi- tudo afferunt, in hoc bello locus atque opportunitas. Præeuntibus jam firmo pede Magistris, qui castra se- quuntur, advescunt sensim studio indagandi & deperi- endi eandem, nihil temere admittendo, nihil respuendo tumide. Quanta intercedat familiaritas cum *Platone*, cum *Aristotele*, cum *Cartesio*, cum *Wolffio*, & quo non alio in- cluto coeteroquin valdeque æstimando Doctore, sicubi ad pugnam signum datur, soli veritati litandum esse norunt, & quod alacri animo omnem conculcandam habeant Opinionem, auro licet & gemmis distinctam i. e. specio- sam valde, informantur ac commoventur. Hinc quicquid Veritati collum submittere detrectat, est illis Anathema.

Polemosophia invitatur *Angelos Academicarum*, ut mutuam opem ex amore mutuo sibi ferant. Nulli ignotum est, quam Aurum in centro terræ habitans, ut in lucem protraha- tur, uno plures velit metallicolas, qui inexhausta indu- stria eo collaborent. Quam itaque pulchrum quam ho- norificum rutilanti veritati manus socias subdere, quo, ac est in alto reposita, & in puteo, quod voluit Democri- tus, in conspectum prodeat, & splendore suo reficiat quosvis contemplantes? Illa nullum suavius animo re-

focillamentum, nulla homini jucundior voluptas. Linquamus Mythologis sensus varios de *aurea illa catena Jovis*, (ut est apud *Homerum*) quam hic coelo suspendit, eademque appendi Deos jussit ad faciendum periculum, an ipsum possint in terram detrahere. Quam sibi sumunt libertatem, nos quoque nobis sumamus, & non citra gravissimas rationes statuamus: veritatem auream esse catenam, qua tanquam vinculo artes & scientiæ sunt conjunctæ, ut nulla seorsim doceri, aut capi commodè possit, quin una alteri ferat suppetias. Donum quoque coeleste sunt, ex quo sciendi desiderium animis infidet & media multiplicis generis ad illam apprehendendam benignissime conceduntur. Itane vero veritas coelo alligata, quo, ac Dii omnes detrahere catenam haud potuerunt, illa sit omni mentis humanæ conceptu altior vel imperscrutabilis? Non sane, modo quod omniscientia sit mortalibus denegata, semper tamen sub laboribus mutuis & indefessis ingeniorum à coelo multiscientia sit in animorum oblectamentum ac obsonium, sed imprimis in mutuum adjutorium.

Polemosophia coercet Angelos Academiæ, quo unanimes bella pro veritate gerant. Nil citius perdere exercitum discordia præfectorum, tot exempla probatum dederunt, ut sub testimoniis rerum verbis opus non sit. Damna pariter gravissima in Republica literaria surgunt, quando sub Pallade bellatrice stipendia merentes Doctores contentionibus dant locum, ut in illis unum studium non conjungat animos, sed societatem Discordia dissolvat. Quanti intersit econtra, ut ad hanc legem militarem, concordiam jubentem, attendant, vel abhinc constare poterit, quod, quasi esset primaria, toties quoties commendatur, effertur summis laudibus, inque omnibus

bus fere paginis repetitur; si polemosophiam sacram
sive Pandectas sacras evolvamus. Non est, ut omnes
ac quævis disceptationes in almīs exulare jubeantur.
Sunt limæ, quibus rubigo Doctrinæ tollitur; Sunt ferræ,
quæ viam ad interiora pandunt; Sunt venti, quibus na-
vis fluctibus agitata portum celerius intrat. Hoc ta-
men cavendum, ne feriat tales reprehensio *Ciceronis*.
*Omnium ineptiarum, inquit, quæ sunt innumerabiles, haud scio
an sit ulla major quam illorum, qui solent quocunque in loco,
quoscunque inter homines visum est, de rebus aut difficillimis,
aut non necessariis argutissime disputare.*

Polemosophia excitat quosvis ex numero angelorum Aca-
demiarum, ut civile æque ac externum bellum suscipiant. Nil
bello civili foedius esse fatentur, qui castra sequuntur;
pariter Angeli memorati habent, ut ad civiles contro-
versias attendant, quod pericula hinc longe majora im-
minent. Tales vero suggerunt Philantia, Ambitio, Invi-
dia, Avaritia, morosa Severitas &c. quibus ut scintillis
obveniendum, ne in flammam abeundo, quicquid lau-
dabile ac in commoda scientiarum cedere potest, con-
sumatur ac pereat. Consulendum ergo, ut contra se
pugnent, cristas erigentes motus cordis pravos quanto-
cuius conculcent, iis armis, quæ ad concupiscentias pra-
vas debellandas suadent aliis, proprias rescindant, sic-
que exemplo pariter ac verbis doctrinam suam reddant
amabilem. Est equidem bellum hoc majus, quam ut
ab homine conficiatur: ast, de quo antea, exemplum &
vox Imperatoris animum addunt, ut eo audentius con-
tra eatur, & se Præfecto summo omnia cedant prospere
ac feliciter.

Subsistere in his porismatibus placuit, *Polemosophiam*
academicam respicientibus: in aliud tempus, si DEO ita
visum

visum fuerit, servando, quæ de requisitis Angelorum, de quibus sermo, ut *bonam disciplinam servant, exercitum legitime ducant, militem eligant, castra disponant, moneant qualia arma capienda, quo ordine in itinere progrediendum, quo pacto hostis inpetendus, quomodo denique triumphandum sit*, amplo sermone dici potuissent. Sufficere quoque nobis hodie allata poterunt, si animum à sensibus externis sevocatum contemplationi prædictorum dare, & quod ad milites attinet, fidele summo Præfecto nostro obsequium, tum quoque Ducibus & Capitaneis obedientiam præstare allubet. Dantur, proh! milites improbi in castris; nec Alma penitus desidiosos Tyrones ignorat. Indulgent ingenio, quando de arduis, gravissimisque ad felicitatem facientibus rebus deliberandum. *Stentorem* sibi sumunt Capitaneum, qui clamores aliorum quinquaginta voce ærea superavit. O! quam bruta voluptas! *Achillem* sequuntur, sed veste virginea indutum. O! quam animus abjectus: *Herculem* imitantur, sed coram *Omphale* sua sedentem, & colum tractantem; O! quam indecens vitæ genus. Hostes sibi fingunt, sed tenebrosos. Muscarum instar magnum quidem strepitum excitant, sed mera duntaxat damna & clades graves sibi parant. Quod si hi existimaverint in sui ignominiam talia proferri, ægre, jubeo, ita hoc ferant, ut se in gratiam cum Campi-Ducibus redire velle, temperantia, fidelitate, sedulitate, & quæ virtus militem ornat ac instruit, obsequio testatum faciant. DEUS exercituum, Dominus Zebaoth sit nobis omnibus & singulis
in adjutorium!

P. P. SUB SIGILLO RECTORATUS,

Ipso Festo S. MICHAELIS.

d. 29. Septemb. A. O. R. MDCCXXXII.

